


二十二史感應錄





錄應感史二十二

彭希凍輯

叢書集成初編

(本印補)

二十二 史感應錄

一九三九年十二月初版

一九六〇年五月補印

彭希涑輯

商務印書館出版

上海洪興印刷廠印刷

原序

春秋者史家之祖也。春秋紀載異所以著天人感應之故甚明。左氏因而傳之。凡國之廢興。人之生死。事之成敗。必先原其善惡得失之所由。而究其所終極。如立竿觀影。持鏡取形。無豪髮之爽。其人也。其天也。其皆一心之自爲感應也。自周以降二千年間。史家記載。事變日出。不可殫窮。而有不變者存焉。由不變者觀之。其天人感應之故可得而詳矣。然感應之故。有可知。有不可知。善者祥。惡者殃。此其可知者也。善者不必祥。惡者不必殃。此其不可知者也。夫使天之與人判然其相格也。冥然其不相關也。是則古來感應之故。類不足憑。乃其可知者。固已章章矣。卽其可知者而推之。天之與人誠若是其相關。而未始相格也。必無有明於此。而闇於彼者也。必無有通於此。而窒於彼者也。然而善者不必祥。必其善有未至也。不然。彼其祥有不可見者矣。惡者不必殃。必其殃有未熟也。不然。彼其殃有不可見者矣。夫不可見。則不可知矣。然而未始不可知。吾於其可知者知之。其可知者。其不變者也。太上感應篇。出於道藏。其書導人以修身立命之學。其旨足與春秋左氏相發。後之注者多雜引稗官小說。不足徵信於世。兄子希涑閱二十二史。取其事應之顯著者。彙而錄之。分爲二卷。將刊板以行使。使人知天人感應之故。不以古今而異其豪髮。其於君子修身立命之學。當有助焉。易大傳曰。善不積不足以成名。惡不積不足以滅身。夫君子之爲善也。未始謂爲善也。有去惡而已矣。去惡即善也。善之所由以積也。小人之爲惡也。未始謂爲惡也。有自

以爲善而已矣。自以爲善卽惡也。惡之所以積也。是故君子日虛。小人日滿。虛者集祥。滿者集殃。其天也。其人也。其皆一心之自爲感應而已矣。而何不可知之有。讀是書者。誠能反躬自鑑。決去其惡。勉進於善。日積而不已。求自盡於其心焉。吾知天必有以應之矣。乾隆四十六年孟夏之月長洲彭紹升序。

自序

自有載籍以來。勸懲之書多矣。其言感應之故詳矣。大要在使人止惡而進善。欲使人止惡而進善。必先有以起人之信心。信與不信。善惡之所自萌也。太上感應篇。載善惡條類綦詳。其旨通於六經。而其公案具在二十二史。後之爲註釋者。多採取稗官說部里巷傳聞。以爲之證。使童駢婦豎見其書。聆其說。莫不形惕心惴。其爲功於世教。非淺。而當世士君子。反有以文不雅馴。菲薄不屑視者。始以其事爲不足信。繼且以其理爲不足信。豈太上煌煌垂訓。可以勸愚衆。而不足以規學者哉。夫輕薄佻浮之子。偭規越矩者。勿論矣。卽其間有志進修者。傷德喪名之行。自問無之。而或勉其暫不能慎其常矜於衆。不能慊於獨。然則善何由而純。惡何由而盡。苟非取古昔記載。切於勸懲者。置之左右。反覆尋覽。曉然洞悉於感應之所由。不以初終隱顯。而或二又烏能奉身寡過。而俯仰無愧怍也哉。希深幼承家學。頗知向往。稍長。閱歷世故。益有契于感應之理。爰以讀史餘閒。擇其善惡事蹟。果報最著者。得一百八十餘條。編爲二卷。子曰。舉一隅不以三隅反。則不復也。二十二史。無一事而非感應之證也。茲之所載。二十二史之一隅也。伊古及今。普天匝地。無一事而非感應之證也。二十二史。又古今感應之一隅也。推之而稗官說部里巷傳聞。苟由此而反之。其理明。其事確。又何不可信之有。吾願讀是書者。決志進修爲善。去惡如火之然。如泉之達。是書所錄之善。吾得取之以爲善。所錄之惡。吾得反觀內鏡。務使根株之胥絕焉。然則太上垂訓之旨。其

二十二史感應錄

自序

不在斯乎。彭希涑序。

凡例

一史書所載善者祥惡者殃其事不勝錄也茲取天人感應之神異顯著者凡降祥降殃確知爲某善某惡之報則錄之。

一事有暗相關照而其故不甚明著者如李斯譖韓非下獄非欲自陳不得後李斯爲趙高所譖亦欲自陳不得此類甚多若欲繁引殫書轉屬有心牽合且挂漏反多概不載入。

一如史記所載而復見漢書則不重錄從其較詳者錄之。

一所載禍福報應祇錄其與本事有關者其終身名壽子孫不盡載或所作善惡之報必合終身名壽子孫而後見者則仍書。

一是書原爲士大夫修省之助至本紀所載皆不錄入若春秋列國諸侯位非至尊分有相匹仍錄之一書一事而義可觸類貫通或其事互見於他書中者附書於後庶理完而文備云一採輯既就別作緒論數條判決疑義綜論得失以就正於尙論之君子焉。

緒論

史書體例不志怪神。然有可以明人事之得失者。雖涉靈異不以爲病。如史記載秦穆公死七日而寤。曰我之帝所甚樂。且謂帝與言晉國休咎甚悉。命書而藏之。皆驗。又趙簡子疾不知人。旣寤。語大夫曰。我與百神游於鈞天廣樂。九奏萬舞。不類三代之樂。亦謂帝與言晉國事亦皆驗。其事兩見於趙世家。扁鵲傳使人知天人相與之故。則知所以事天。故不厭詳也。若晉書載劉聰爲遮須夷國主。隋書載韓擒虎爲閻羅王。義無可取。乃爲體例之病矣。

司馬子長於天人之理甚明。其論韓氏之昌。以爲存趙氏之陰德。表其微也。蒙恬之誅也。自謂絕地脈之咎。而子長以阿意興工。不惜民力。爲恬罪。舉其大也。其必有當矣。

後漢書史弼傳論曰。語云活千人者子孫必封。史弼全平原之黨。而其後不大。斯亦未可論也。按弼爲平原相時。詔舉鉤黨。郡國所奏連及者多至數百。弼獨無所上。濟活者衆。弼後爲河東太守。爲侯覽所誣下獄。詔論棄市。平原吏人奔走詣闕訟冤。委曲營救。以免弼罪。復起官以壽終。方弼被逮時。其去死也近矣。卒賴平原人以免。豈非活人之報耶。由是推之。爲善而福不至。必陰消其無形之禍也。其稟諸命者本薄也。爲惡而禍不至。必陰消其當得之福也。其稟諸命者本厚也。迨善惡之積既久。而命迺退處無權。則人定勝天也。

後漢書袁安拜楚郡太守時治楚王英獄。英辭所連及者數十人。吏按之急。迫痛自誣。死者甚衆。安到郡理其無明驗者出之爲河南尹。政號嚴明。然未嘗以臧罪鞫人。安後位至司空。子孫貴盛。史氏論曰。袁安理楚獄。未嘗鞫人於臧罪。其仁心足以覃乎後昆。子孫之盛不亦宜乎。愚按安之不鞫人於臧罪。非得其臧狀而故縱之也。蓋推其居心仁恕。不欲入人於重罪耳。宋史。韓億見諸路有擅拾官吏小過者。輒顏色不擇。史氏因以爲其後必大合而觀之。皆所以覘人心術之微也。

後漢書范滂被黨禍。將誅。顧謂其子曰。吾欲使汝爲惡。則惡不可爲。使汝爲善。則我不爲惡。夫桓靈之間。黨禍蔓延。殘賊士類。蓋亦氣數之厄。然而匹夫橫議。品覈公卿。裁量執政。固有取禍之道矣。若范滂者。清心自好。克有令名。然疾惡過甚。爲郡功曹。致中人以下。莫不歸怨卒以此得罪。太剛必折。物理之常。尚不自反而慷慨仰天。語多怨尤。惜不奉教於郭林宗袁夏甫諸君子也。

宋書劉湛被收入獄。亦謂其弟曰。相勸爲惡。惡不可爲。相勸爲善。正見今日如何。湛初爲殷景仁推引。共參政事。乃以景仁位居已前。反相傾構。又附宗室義康。無人臣之禮。卒以伏誅。宜矣。若其他小節。卽如生女輒穀。爲士流所怪。何者。可自附於善邪。小人之爲惡。終其身不自知其惡也。吁。可畏已。

南齊書謝朓告王敬則反。敬則女爲朓妻。常懷刃欲相報。朓不敢相見。及朓以他罪將見誅。歎曰。天道其不可昧乎。我雖不殺王公。王公因我而死。朓爲人臣。知敬則反狀。而具以告義也。與計發人陰私以爲己利者不同。豈其以是獲罪於天哉。

或以梁武崇信佛法卒遭侯景之禍。疑報應之理不足憑。不知梁武弑齊主東昏侯及和帝以取其位。侯景之禍固其報復也。朝野僉載謂東昏侯死之日侯景生焉。時人以景爲東昏侯後身。其說殆信。唐長孫無忌褚遂良皆以直諫獲罪。人皆哀之。然無忌遂良與江夏王道宗不協。遂良又誣奏道宗罪。配流象州。病卒無忌又陷吳王恪誅之。遂良又誣劉洎罪。賜自盡。而無忌遂良卒皆不得其死。舊唐書以爲天網不漏。豈不然哉。劉肅唐世說亦謂遂良之敗由陷洎之報。又載無忌之害吳王恪也。恪臨刑罵曰。無忌竊弄威權。構害良善。若宗社有靈。當見其族滅。不久竟如其言。與史論可互證云。

爲將以嗜殺受陰禍。是錄中所載多矣。其理更有見於史書論贊中者。宋史王韶。章袞皆用兵有功。韶子案能致天神。帝試之無驗。袞子綰或誣以私鑄錢。配沙門島。論曰。佳兵好還。道家所禁。案以左道殺綰以鑄錢。陷非其驗歟。明史徐達。常遇春俱爲太祖將。遇春下城邑不能無誅。僇達所至不擾。達後贈中山王。子孫世其爵。遇春年四十暴疾卒。追封開平王子。茂襲爵未久。以事安置龍州。贊曰。中山賞延後裔。世叨榮寵。而開平天不假年。子孫亦復衰替。貴匹勳齊。而食報或爽。何也。太祖嘗語諸將曰。爲將不妄殺人。豈惟國家之利。爾子孫實受其福。信哉。可爲爲將帥者鑒矣。

余觀古名臣事業。凡拯亂救荒。以及河渠工築。動活數十萬人。未嘗不歎仁人之利之溥也。雖然。尤願人反求諸心。卽所能盡者而自盡焉。如史稱宋曹彬總戎專征。秋毫無所犯。而其平居於百蠱之蟄。亦不忍傷。使彬不爲將。而抱此不忍傷一物之心。與下江南不殺一人之心。無盈絀無廣狹也。然則一介之士。孰

不可自盡其心乎。賈子稱孫叔敖埋蛇而母知其陰德。撫言稱裴度還帶而神貌頓改。彼之所以動天者亦一念之力耳。豈必有憑藉而後得行其志哉。

或謂伊古忠臣孝子多身際蹇屯流離患難不必盡有風雷之感。呵護之靈而身犯不韪者。或竟坐享福澤終其身何也。曰天之嚮福也有五。壽富康甯考終命此四者其事無過一身之樂而其時不越百年之間。若天所以福聖賢而不與庸衆共之者則攸好德而已。夫純臣孝子處辛苦難堪之境而甘之如飴者豈有他哉。彼將以成仁而取義也。仁義者天地之心而人之所以爲人也。彼體天地之心以求盡人之所爲人浩然之氣塞於兩間流萬古而不息而天顧以憐庸庸者憐之豈因材而篤之道乎。若夫罔之生也幸而免免矣仍未始免也。宴然食息運動而其有生之理已盡而無餘則一行尸而已矣。其與身受誅殛夷滅者何以異哉。

世俗神滅之說昔人辨之甚詳然不若證以實事尤爲較著。如漢書元始元年二月朔方廣牧女子趙春病死斂棺積六日出在棺外自言見其死父曰年二十七不當死太守譚以聞後漢書建安四年二月武陵女子李娥物故瘞於城外已十四日有聞其冢中有聲者發出遂活註中言娥見冥中事甚悉晉書干寶父亡母生推婢于墓中後十餘年母喪開墓而婢伏棺如生載還經日乃蘇言其父常取飲食與之家中吉凶輒語之地中亦不覺爲惡又寶兄常病氣絕積日不冷後遂悟云見天地間鬼神事如夢覺不自知死寶遂撰集古今神祇靈異人物變化名爲搜神記遼史孩里從上獵墮馬償而復蘇言始見二人引

至一城宮室宏敞有衣絳袍人坐殿上左右列侍持牘者曰誤執汝示之牘書官至使相壽七十七擠之大壑而寤上聞之命書其事後皆驗明史洪武二十四年河南龍門民婦司牡丹死三年借袁馬頭之屍復生此皆死而再生見冥中事者也北史魏臨漳令李庶亡後其妻元氏更適趙起夢庶謂曰吾薄福託劉氏爲女明日當生彼家甚貧恐不能見養夫妻舊恩故來相見告君宜取我劉家在七帝坊十字街東南入窮巷是也元氏不應庶曰君似懼趙公意我自說之於是起夢亦符遂持錢帛往求劉氏如所夢得之養女長而嫁焉魏書宋穎妻鄧氏亡後十五年穎夢鄧氏向穎拜曰新婦今被處分爲高崇妻故來辭君泣然流涕崇亦旋卒南史齊宗室鏗死後有陶宏景與鏗舊識忽夢鏗來慘然言別云某日命故無罪後三年當生某家宏景訪以幽中事多秘不出覺後訪之果與夢符舊唐書崔威父銳爲澤潞從事有道人自稱盧老銳館之于家一旦辭去且曰我死當與君爲子因指口下黑子以爲志咸之生也果有黑子其形神卽盧老也父卽以盧老子之宋史王氏婦梁歸夫家數月會元兵至婦謂夫曰吾不受汙必死若後娶當告我頃被掠不辱而死夫後以無嗣謀更娶夢妻曰我死後生某氏家今十歲矣後七年當復爲君婦明日遣人聘之一言而合詢其生與婦死年月同此皆死此而生彼者也北史夏侯夬亡後三日其交好相率至夬靈前時日晚天陰咸見夬在坐衣服形容不異平昔但無語耳夬從兄欣宗忽作夬語如平生發家人陰私竊盜皆有次緒明史毛吉官廣東僉事戰死方出軍時賣千金犒委驛丞余文司出入已用十之三旣死文憫其貧以所餘金授吉僕使治喪是夜僕婦忽坐中堂作吉語曰請夏憲長來舉家

大驚走告。按察使夏壎至。起揖曰：吉受國恩不幸死於賊。今余文以所餘官銀付吉家。吉負垢地下矣。願亟還官毋累我。言畢仆地。頃之始甦。此皆死而與生人接語者也。他如是錄中所載。幽明感應事甚多。彼執死而神滅之說者。豈往古記載皆虛矯不足信乎。抑別有說以解此乎。蓋亦弗思爾已。

或謂生命脩短。謂有鬼神掌之。如增算奪紀之說。有可徵乎。曰：博物志謂泰山主召人魂魄。司生命之長短。證諸於史。後漢書許峻傳。峻自云嘗篤病三年不愈。乃謁泰山請命。烏桓傳死者魂神歸赤山。如中國人魂神歸泰山也。三國志管輅傳。輅謂其弟辰曰：但歸至泰山治鬼。不得治生人。其說可信矣。又宋書謝宏微之卒也。時有一長鬼寄司馬文宣家。云受遣殺宏微。宏微疾增劇。輒豫告文宣。宏微旣死。與文宣分別而去。則勾召魂魄者。又實有之矣。

列史五行志。有人變異形者。後漢書靈帝時黃氏之母。浴而化爲龍。入於深淵。其後時出見。晉書吳孫皓寶鼎元年丹陽宣騫母。年八十。因浴化龍。宋史衡湘間人。有化爲虎者。夫心形之主也。人之異於禽獸者。在心不在形。孟子曰：夜氣不足以存。則其違禽獸不遠。可以得輪迴之理矣。

二十二史感應錄卷上

蘇州彭希涑蘭臺輯

史記

宋景公時。熒惑守心。心宋之分野也。景公憂之。司星子韋曰。可移於相。景公曰。相吾之股肱。曰可移於民。景公曰。君者待民。曰可移於歲。景公曰。歲饑民困。吾誰爲君子。韋曰。天高聽卑。君有君人之言。三熒惑宜有動。於是候之。果徙三度。宋世家。

魯桓公如齊。齊襄公使力士彭生拉殺魯桓公。而殺彭生以謝魯。十二年。襄公獵沛邱。見彘。從者曰彭生。公怒射之。彘人立而啼。公懼。墜車傷足。公孫無知等聞公傷。乃作亂。齊世家。

狐突之下國。遇太子申生。申生與載而告之曰。夷吾無禮。余得請於帝。將以晉與秦。秦將祀余。狐突對曰。臣聞神不食非其宗。君之祀毋乃絕乎。君其圖之。申生曰。諾。吾將復請帝。後十日。新城西偏。將有巫者見我焉。許之。遂不見。及期而往。復見申生告之曰。帝許罰有罪矣。弊於韓。惠公六年。秦伐晉。合戰韓原。秦獲晉侯以歸。晉世家。

衛鞅好刑名。執秦政。封於商。定變法之令。民有言令不便者。或有言令便者。盡遷於邊城。公子虔犯約。劓之。公子虔之徒告商君。欲反發吏捕商君。商君亡。欲止客舍。舍人曰。商君之法。舍人無驗者坐之。商君歎。

曰嗟乎爲法之弊一至此哉去之魏不受內之秦秦人車裂以徇商君傳秦將武安君白起累戰有功其後秦王使武安君攻邯鄲武安君稱病不行秦王怒賜之劍令自裁武安君引劍將自刭曰我何罪於天而至此哉良久曰我固當死長平之戰趙卒降者數十萬人我詐而盡坑之是足以死遂自殺白起傳

按夷堅志載江南民陳氏女年十七素不知書得病臨絕忽語人曰我秦將軍白起也爲生時殺人七八十萬在地獄受無量苦近始得復人身然只世世作女人壽不許過二十歲今日之死亦命也夫言畢而歿然則史書所載特其現生較著者耳

陳涉反秦使王翦之孫王離擊趙圍趙王及張耳鉅鹿城或曰王離秦之名將也今將彊秦之兵攻新造之趙舉之必矣客曰不然夫爲將三世者必敗必敗者何也以其所殺伐多矣其後受其不祥今王離已三世將矣居無何項羽救趙擊秦軍果虜王離王翦傳

呂氏妬戚夫人有寵遂酖其子趙王如意而殺戚夫人後呂后過軻道見物如蒼犬據后掖忽弗復見卜之云趙王如意爲祟呂后遂病掖傷未幾崩呂后本紀

陳丞相平佐高祖定天下多出奇計封曲逆侯嘗曰吾多陰謀是道家之所禁吾世卽廢亦已矣終不能復起以吾多陰禍也其嗣何坐罪國除曾孫陳掌以衛氏親貴戚願得續封然終不得陳丞相世家魏其侯竇嬰武安侯田蚡俱漢外戚時灌夫亦倚魏其而列封侯及魏其罷政武安爲丞相使人請魏其

城南田魏其大望曰老僕雖棄將軍雖貴甯可以勢奪乎時灌夫聞怒罵使者武安由此大怨灌夫魏其元光四年武安取燕王女爲夫人詔召列侯宗室往賀武安勅灌夫罵坐不敬誅灌夫族魏其銳身爲救亦棄市其春武安侯病專呼服謝罪使巫視鬼者視之見魏其灌夫共守欲殺之竟死魏其武安傳

李廣爲漢將善騎射號曰飛將軍然不得爵邑嘗謂望氣王朔曰諸將材能不及中以軍功取侯者數十人廣不爲後人然無尺寸之功以得封侯者何也豈吾相不當侯乎且固命也朔曰將軍自念豈嘗有所恨乎廣曰吾爲隴西守羌嘗反吾誘而降降者八百餘人吾詐而同日殺之至今大恨獨此耳朔曰禍莫大於殺已降此將軍所以不得侯者也廣後以出征失道自殺孫陵又以降敵族誅李將軍傳

王溫舒好殺伐爲廣平都尉捕豪猾連坐千餘家大者至族小者論死其治中尉姦猾窮治大抵盡靡爛其爪牙吏虎而冠後人告溫舒姦利事罪至族自殺其時兩弟及兩婚家以各自坐他罪而族光祿徐自爲曰悲夫古有三族而王溫舒罪至同時而五族乎楊僕傳

漢書

霍光爲大將軍威震海內光妻顯私使乳醫行毒藥弑許后及光子禹嗣博陸侯繕治第宅走馬馳逐子樂館顯夢第中井水溢流庭下竈居樹上又夢大將軍謂顯曰知捕兒不亟下捕之第中鼠暴多與人相觸以尾畫地鴟數鳴殿前樹上第門自壞禹夢車騎聲正譴來捕禹舉家憂愁遂謀逆事發禹要斬顯及諸女昆弟皆棄市霍光傳